

中國歷代畫史匯編

中國歷代畫史匯編

(10)

遲見

鴻軒所
書畫錄

曹允源署檢



遲鴻軒所見書畫錄卷四

歸安楊 峴庸齋編輯

萬壽祺字年少號沙門壽慧明志道人江蘇徐州人崇禎庚午舉人甲申
後隱吳門工白描人物花卉精篆隸鐫刻著隰西堂內景諸集李梅卿
比部藏有白描水仙長卷簾出塵紛殆仙品也景劍泉閣學藏有採之
士女立幀得靜女幽閒之態古肆見有墨山水金箋立幀下筆有風舒
雲卷之勢極此唐人風骨

萬上遴字輞岡江西南昌人山水宗迂老書法近思翁寫梅爲童鉦繼起
陳葆珊觀察藏有墨山水大卷石廓峻嶒樹木夭矯兼北苑處居多張
今坡觀察藏有墨梅大幀亦頗老健

萬承紀字廉山江西南城人乾隆壬子副貢生官南河同知書畫宗南宮詩學劍川屠倬極重之曾筌巢侍御藏有墨筆江山一覽圖大卷得巨師之氣暈觚棱轉折饒實力量曾觀其墓志稱其畫學米顗蓋撰文家非通曉畫理者也

萬經字授一號九沙浙江鄞縣人斯大子康熙癸未翰林薦鴻博工隸書著分隸偶存余藏有隸書六行絹箋大幀古趣盎然惜墨痕脫落又隸書壽槃齊匾額行書跋四行

卞永譽字令之號仙谷漢軍正藍旗人廕生官山西巡撫工書畫精鑑定富收藏著式古堂書畫備考景劍泉閣學藏有墨筆柏石立幀雅肖頂

孔彰

邵士燮字友園號范村又號桑棗園丁安徽蕪湖人諸生嗜古工隸山水師邵瓜疇景劍泉閣學藏有五行隸書大幀又仿惠崇江南春圖立幀弟士鈴字用耕號東田山水宗司農杭芷舸明府藏有仿大癡設色秋山圖立幀弟士愷字犀函號鐵君乾隆庚戌進士官福建政和知縣山水多荒寒蕭瑟景王金珊農部藏有寒林遠岫圖立幀弟士昆字劍門號吾山工山水嘗獨行林莽間枯坐竟日范中立所謂師造化者獨其畫未獲觀焉

邵聖藝字仲遊一字貢父號雲巢江蘇常熟人山水宗思翁心泉上人藏有墨筆仿一峰老人大卷作年七十二歲雅秀流溢絹素間仍是思翁一派也

邵彌字僧彌以字行號瓜疇江蘇長洲人書法褚虞畫宗宋元吳偉業作畫中九友歌紀之甲申後存者王時敏王鑑張學會及僧彌也瑛蘭坡中丞藏有設色山水便面深得黃子久神奧張樵堃少司農藏有水仙立幀欸署洛浦幽芳仿趙子固雙鉤本以雙鉤寫花葉焦墨畫石一段清淑之氣浮動楮間

謝松洲字滄湄號疎林江蘇長洲人布衣應世廟召入鑑定內府所藏書畫工山水詞翰張朗山大理藏有墨山水綾本小卷融會倪黃無摹擬氣習別具靈警嫩逸之氣純從鑑賞中得來世傳其畫少幾等廣陵散矣

謝道承字又紹號古梅一號種芸山人江蘇金山人康熙辛丑進士官內

閣學士工詩翰著小蘭陔集古肆見有行書古詩卷

謝希曾字孝基號安山江蘇吳縣人諸生工小楷山水精鑑賞以所藏名蹟摹泐禊蘭堂法帖著易學指南瑛蘭坡中丞藏有墨山水便面與香光相契合

謝蘭生字佩士號澧浦廣東南海人嘉慶壬戌翰林書法大令陳詩庭孝廉藏有沈石田畫卷有其行楷題五律四首

夏輦字羽谷號丕雉一號雲山野史江蘇吳縣人專工寫竹景劍泉閣學藏有墨竹大屏四幀亦夏太常遺製也

夏之鼎字禹庭號苴谷江蘇吳縣人工花卉禽魚書法亦極超妙潘伯寅大司空藏有設色花鳥屏四幀

夏之蓉字芙蓉號醴谷江蘇高郵人雍正癸丑進士復舉鴻博廷試改授檢討著半舫齋詩文集工書法瑛蘭坡中丞藏有小行楷金牋便面錄舊作七律詩用筆在趙董之間

華鯤字子干江蘇無錫人王原祁弟子官直隸州同工山水連緒齋上公藏有仿山樵泰嶽晴雲圖大幀渾樸冲融有絕大力量

華岳字秋岳號新羅山人又號白沙道人東園生福建汀洲人僑寓杭州工山水人物花鳥蟲魚筆意遒勁機趣橫生書宗晉人詩習晚唐著離垢集解弢館詩阜蔭方尙書藏有絹本花鳥蟲魚大卷長約四丈高約四尺領異標新窮神窮變歛識卷首少有剝落昔山人客津門查氏畫兩年始就本係橫幅張之迴廊雨漬所浸吳子復太守藏有絹本山水

大幀清刻瘦硬近程青溪家西園主人藏有絹本三星圖橫幅清挺俊逸左首行楷長題圖章數方皆常作不見者又秋思士女長幀欸署寫一年客易又秋風句於鴛鴦湖畔過雲軒余藏有仿李晞古煙崖蘆渚圖寬幀又鸚鵡桃花紙本直幀古肆見有絹本安樂長春圖大幀自非天真爛發牢籠物態安得匠心獨妙耶

華冠字慶吉號吉崖江蘇無錫人官廣西同知工人物寫照古肆見有折梅士女直幀族子胥字義逸參法龍眠心泉上人藏有白描大迦葉尊者直幀欸署敬摹管道昇本沐手謹繪

華翼綸字遂秋江蘇金匱人道光甲辰舉人畫師司農余家藏有仿北苑墨筆大幀元氣渾淪運筆如飛先伯問樵公欸心泉上人藏有仿淺絳

卷爲中年寓宣南松筠庵時作

鄭簠字汝器號谷口江蘇上元人宋珏弟子工隸書曹蘅溪給諫藏有四行隸書大幀筆力鼎扛師所未逮心泉上人藏有寸隸上元胡貞女事畧冊十八葉

鄭梁字禹楣一字禹梅號寒村浙江慈溪人康熙戊辰進士官廣東高州知府工書畫有曉行詩最佳時稱鄭曉行著寒村集瑛蘭坡中丞藏有墨山水便面着筆不多幽閒清曠

鄭燮字克柔號板橋江蘇興化人乾隆丙辰進士官山東濰縣知縣書法瘞鶴銘而兼黃魯直合其意爲分書通其意寫竹蘭中年間作花木著板橋詩詞文鈔題畫記吳子復太守藏有絹本竹蘭大屏八幀心泉上

入藏有絹本設色桃樹直幀筆雅色妍題識工整學山谷款署乾隆四年夏日寫祝師母大人五十千秋又藏有小行書詩冊秀逸動人與僞託者迥別余藏有設色菊花竹籬立幀趙懷玉題七絕一首又行楷大幀晚年兼隸意

鄭珊字雪湖號堃橋安徽懷甯人武生工山水年逾八十猶操筆不倦張樵堃少司農藏有設色仿各家山水屏四幀筆意蒼厚畧嫌禿重

盛丹字伯含江蘇上元人睂昌子山水師子久花木法包山家西園主人藏有設色仿大癡天白石壁圖大幀氣象雄渾與古有會弟琳字林玉得其要旨周荇農少司農藏有墨山水卷意致瀟灑有林下風

盛遠字子久一字宜山號鶴江浙江嘉興人諸生工書著瓣香閣詩鈔瑛

蘭坡中丞藏有小行楷便面具挺秀姿

盛惇大字甫山號南塹江蘇陽湖人嘉慶己未召試舉人官甘肅慶陽知府工山水與盛大士時稱二盛卓芝民離尹藏其祖海帆相國欸設色山水卷肆力倪黃筆意近漸師連緒齋上公藏有墨山水大幀專仿子久尤覺鎔鑄古法古肆見有與張深合作山水冊八葉各宗一家似合王宸妙諦每葉各署欸識

盛大士字子履號蘭蓀一號逸雲江蘇鎮洋人嘉慶庚申舉人官山陽教諭著蘊懌閣詩文集溪山卧遊錄嵩嶺山司寇藏有墨山水屏四幀皆力追宋元余藏有設色山水大幀先叔祖宜園公欸古肆見有設色袁浦餞春圖大卷直造漁山之室

鄧石如初名避諱以字行更字頑伯號完白一號笈遊道人龍山樵長鳳
水漁長安徽懷甯人以布衣終工書精篆隸鐫刻時稱鄧派劉墉最傾
服延入京師遂訂交焉詒晉齋謂近時書家止二人一山左宰相一皖
南布衣其傾倒賢王可知矣家西園主人藏有三行篆書立幀張仰山
處士藏有行書界朱絲大幀如天馬行空水到渠成自曾文正公國藩
重之廣爲搜羅聲價愈增而廣鼎層出矣弟子程荃字蘅衫同邑人篆
刻紹其傳著篆隱園集心泉上人藏有四行篆書屏六幀

鄧傳密字守之號少白石如子篆隸得家傳景劍泉閣學藏有五行篆書
大幀筆意沉穩堪與乃翁並傳不朽

繆曰藻字文子號南有居士江蘇吳縣人康熙乙未榜眼官洗馬工書精

鑒定增芝田觀察藏有小楷詩箋冊意近趙董

繆頌字癡頌號石林散人曰藻曾孫王玖弟子工詩畫家西園主人藏有墨山水小卷頗得離披之妙

陸恭字孟莊號謹庭江蘇吳縣人王文治女夫乾隆舉人工書善畫嗜古精鑑尤喜搜羅名人尺牘潘紱庭京卿藏有墨花卉小卷筆意古雅眼高手辣蓋由胸次橫有名蹟也

陸愚卿字願吾號魯亭晚號息游江蘇太倉人秉庭訓精鑑賞收藏與畢瀧爲一時之冠家西園主人藏有行書尺牘二通與子載論鐵筆篆法極爲精確又傳其畫筆幽秀未見子因儀字素庵號小湖散人花卉學南田惜亦未見三代風雅太倉靈秀所鍾焉

陸學欽字敦書號子若一號蘊真江蘇鎮洋人嘉慶庚申舉人與盛大士同邑同學同科而同負盛名書法蘇米畫宗奉常兼寫梅著蘊真小草余家藏有墨山水長幀先叔祖宜園公欸

陸道淮字上遊江蘇嘉定人吳歷弟子家西園主人藏有設色山水冊十葉學有本源筆筆入古景劍泉閣學藏有仿夏禹王晴江歸櫂圖大卷又設色仿大癡秋山圖大幀與耕煙如出一手有阮元眼福印章瑛蘭坡中丞藏有淡着色蕉石便面

陸燿字則甫一字朗夫號青來江蘇吳縣人乾隆壬申舉人官河南巡撫工書畫著切問齋集朗甫詩編運河備覽古肆見有墨山水冊十六葉極有氣韻無欸識有印章附葉黃易跋識

陸飛字起潛號筱飲浙江仁和人乾隆乙酉解元川水花卉均法天池工詩詞題詠著筱飲集余藏有墨筆菊籬大幀行書長題飄逸出羣

陸遵書字卽仙一字扶遠號芙苑江蘇嘉定人乾隆戊子舉人官廣東會同知縣工山水梅竹供奉清廷曾與張鵬翀抗行畫苑心泉上人藏有墨筆細皴寒山圖大幀儼似一幅廬州也古肆見有墨筆寒林夕照圖紙本卷款署癸卯冬日二行

廖雲槎字斐舟江蘇青浦人洪範幕客工寫蘭石收琦極推許之張子和比部藏有墨筆蘭影圖絹本立幀筆意韶秀風致嫵媚收琦行書七絕一首名款一行

卓樓字雲木號鶴溪四川華陽人秉恬子道光庚子翰林官吏部侍郎書